


BIHAINIM LEK BILONG MI

STORI BILONG ASEMBLI OV GOD
LONG PAPUA NIUGINI



KEVIN HOVEY

B I H A I N I M

L E K

B I L O N G M I

STORI BILONG ASEMBLI OV GOD
LONG PAPUA NIUGINI

K e v i n H o v e y i r a i t i m

Assemblies of God
P.O. Box 34, Maprik. E.S.P. Papua New Guinea

BIHAINIM LEK BILONG MI

Kevin Hovey i raitim

ISBN 9980-85-704-8

1987 First Published 5,000

Cover artwork: Tarja Rantala

Copyright © 1987 Assemblies of God,
P.O. Box 34, Maprik. E.S.P. Papua New Guinea.

All rights reserved. No portion of this book may be reproduced in any form without the written permission of the publishers, except for brief excerpts quoted in magazine reviews etc.

OL SAMTING I STAP LONG DISPELA BUK

TOK I GO PAS	5
BIHAINIM LEK BILONG MI	7
SINGAUT BILONG BIKPELA	11
KAM LONG PAPUA NIUGINI	15
OL PIKSA	16
KAM LONG ILIGITA	21
STATIM WOK	23
WOK I KAMAP BIKPELA	27
WOK BILONG OL O WOK BILONG YUMI?	31

TOK I GO PAS

Dispela em i stori bilong Asembli ov God Sios i bin kamap long Papua Niugini. Ol i kamap pastaim long Is Sepik Provins olsem na bikpela stori bai i stap long dispela hap. Mi kisim bikpela amamas taim mi wok long painimaut ol dispela stori. Mi laik bai yupela tu i kisim amamas olsem na mi raitim dispela buk.

Mi tok sori long raitim sampela hap stori long ol hevi bipo i save stap namel long ol sios. Mi tenkyu long God long dispela pasin i no stap wankain tude. Olsem na dispela buk, em bilong makim stret ol stori bilong bipo. I no bilong kamapim nupela bel hevi long dispela taim.

KAMAPIM MOA STORI

Yumi olgeta save pinis, stori em i bikpela samting. Olsem na mi amamas long raitim dispela stori long stat bilong Asembli ov God long Papua Niugini. Tasol mi no pinisim olgeta stori na mi raitim daun hia. Nogat tru. Long wanem, yu tu yu save long sampela hap bilong dispela stori we mi yet mi no save long en. Olsem na i gutpela sapos dispela liklik hap stori i ken kirapim yu na bai yu yet yu ken katim daun sampela stori bilong yu yet long kaset na salim i kam long mi o long seketeri bilong Eksekutiv Kaunsil long P.O. Box 34 Maprik. E.S.P.

OL MANMERI I HELPIM DISPELA STORI

I gat planti ol man na meri i helpim mi long save long dispela stori. Tasol ol stori Pasto Don Westbrook, Mrs Davidson na Mrs Easton i raitim em i wanpela as helpim tru. Na Mrs Davidson, Morris Hovey na Cyril Westbrook i bin stori long mi long planti ol samting bilong bipo tu. Stori ol i givim mi i gutpela. Sapos mi yet paulim na raitim kranki, em i asua bilong mi tasol.

BIHAINIM LEK BILONG MI

Long 1939, Pasto Hugh Davidson em i stap Pasto long wanpela taun bilong Ostrelia, ol i kolim Warik. Em i wok i stap long dispela taun, na bihain em i pilim olsem God i singautim em long go long wanpela longwe hap insait long Ostrelia yet. Dispela nupela hap em i laik i go wok long en, em ol i kolim Daintri. Dispela hap i gat ol blekskin bilong Ostrelia i stap na em i laik i go wok wantaim ol bilong lainim ol long tok bilong God. Dispela i kamap long yia 1939 taim woa wantaim Japan i no kamap yet. Long namba 26 de bilong Desemba long 1939, Pasto Davidson i pulimapim famili bilong en long wanpela teks bilong en, na em i ran long haiwe rot bilong i go kamap long Daintri.

Tasol Daintri i no klostu. Ol i mas slip sampela nait long rot pastaim na bihain bai ol i go kamap. Na tu, taim ol i go, ol i wok long lukim sampela ol wantok bilong ol na tok gutbai long ol. Orait, ol i mekim olsem na ol i slip 4-pela nait long rot na ol i kam slip wantaim sampela ol wantok bilong ol long wanpela taun, Makai. Long dispela nait ol i slip long Makai, draipela ren i pundaun i go inap tulait.

Tulait moning ol i kirap gen bilong i go moa yet. Em long namba wan de bilong Janyueri long 1940. Ol i go, tasol abrus bilong en, dispela draipela ren i stap yet. Orait, ol i lusim taun longwe liklik na ol i bungim wanpela baret nau, nem bilong en, Okonel.

Long dispela rot bilong bipo, ol i mas brukim dispela wanpela baret planti taim. Ol i kamap long baret nambawan taim, tasol, sori tumas, baret i gat tait pinis. Tasol ol i traim makim na em i no daun tumas na ol inap brukim dispela baret. Ol i ran i go gen na ol i kamap long narapela hap bilong dispela baret na ol i mekim olsem tasol. I go i go, na bihain, ol i laik brukim gen tasol taim ol i laik makim wara long baret, olaman, klostu tait i karim ol. Draipela wara pinis ya. Davidson wantaim lain bilong em, ol i lukim olsem na ol i tanim bek hariap. Ol i laik brukim ol baret gen na go bek long Makai, tasol tarangu, draipela tait i kam pinis bihain long ol na ol i nogat we nau. Ol i draidok nating long hap bilong dispela baret.

Taim ol i lukluk raun, ol i lukim tupela narapela teks i stap kipas wantaim ol. Wanpela em i wanpela narapela famili, na narapela teks em i wanpela masta mak, man bilong pulim sen bilong makim ol graun. Nem bilong en, Mr Sheldon. Em yet em i save wok long dispela hap, na em i save long olgeta kona bilong dispela hap ailan ol i stap long en. Ol i bung wantaim nau, na masta mak em i tokim ol long wanpela haus i stap nating. Em i kisim ol i go na ol i askim papa bilong dispela haus, na em i tok orait long ol i ken slip long dispela haus.

Ol i putim samting bilong ol long dispela haus, na bihain dispela tripela lain ol i wok long stori long ol i kam we na ol i laik i go we na ol i save mekim wanem. Tasol taim dispela masta mak em i harim olsem Davidson em i wanpela pasto na em i laik wok wantaim ol blekskin bilong Ostrelia, sori, mi no ken tok - pes bilong en i senis olgeta na i kamap olsem blek sospen stret. Pes drai olgeta! Em i harim olsem na em i wok long tok nogutim Davidson nau.

"Yu ya! Yu wanpela man bilong paulim ol blekskin a? Yu save mumutim nabaut ol mani bilong ol a? Mi save long kain bilong yu! Misineri na Pasto em wanem samting? Man bilong paulim man tasol!"

Masta mak em i wok long hatim tarangu Pasto Davidson

nogut nogut tru. Tasol Davidson em i no bekim wanpela tok long en. Stat long dispela taim, masta mak em i no mekim wanpela gutpela tok long en. Nogat. Planti taim em i wokabaut pes drai nating, tasol sapos em i laik toktok, em bai i tok nogutim Davidson tasol. Orait, ol i pilimpinis nau, olsem na long apinun, taim ol i laik slip, Davidson em i kisim Baibel bilong en wantaim ol lain bilong em na ol i go sindaun insait long kat na ritim Baibel na beten. Wokim pinis, na ol i go insait long haus bilong slip tasol. Long wanem, ol i save, sapos ol i laik wokim long haus, baka ya bai smokim ol tru yet ya!

Orait, ol i drai na i stap planti de liklik, wetim tait bilong dispela ol baret. Tasol em i taim bilong ren tru na wara i no drai hariap. Ol i wet i stap na ol i slip wantaim tarangu, masta mak ya. Ol i stap 4-pela de pinis, na masta mak em i singautim Davidson. Tupela tasol i go i stap arere long haus, na masta mak em i tok isi long em. Em i tok, "Harim! Nau mi luksave long pasin bilong yu. Yu narapela kain man. Mi lukim yu olsem yu no man bilong paulim man. I luk olsem yu wanpela gutpela man tru ya. Mi sori tru long mi bagarapim yu nogut tru."

Bihain em i skruim hap tok gen. Em i tok, "Harim! Sapos yu laik mekim sampela gutpela wok bilong helpim ol sampela man we ol i no save long tok bilong God na ol i stap nogut tru, yu mas bihainim lek bilong mi stret."

Na Davidson i kirap nogut tru na em i askim em, "Wanem dispela tok, 'bihainim lek bilong mi'?" Em i tok, "Bipo liklik, mi stap long Sepik Distrik bilong Papua Niugini long wanpela hap ol i kolim Maprik. Mi bin wok long pulim sen long dispela hap. Na mi lukim olgeta pipel long dispela hap, ol i stap nating tru. Tok bilong God em i no kisim ol yet, na ol i stap nogut tru. Sapos yu laik mekim gutpela wok bilong neipim ol kain lain olsem, orait, yu mas bihainim lek bilong mi. Mi tokim yu stret." Davidson i harim pinis na em i stap tingim tasol. Em bai tok wanem? Dispela tok i sutim bel bilong en tru olsem spia.

SINGAUT BILONG BIKPELA,

Bihain, wara i drai, na Davidson em i kisim lain bilong en na ol i go long dispela ples Daintri we ol i laik wok long en. Ol i kamap pinis na ol i wok i stap. Tasol tingting bilong Davidson i no sindaun gut – hangamap olsem raksak ya. Long wanem, dispela tok bilong masta mak em i sutim bel bilong Davidson olsem spia stret. Spia bilong Bikpela, bai yumi tok wanem. Olsem na taim em i go kamap long dispela ples we em i laik wok long en, Davidson em i baim wanpela bikpela mep bilong Papua Niugini na em i hangamapim insait long haus bilong en. Na olgeta de yet em i wok long beten long Papua Niugini, stat long 1940 na i go inap long 1945 taim Davidson i lusim Daintri.

Davidson em i pilim pinis dispela singaut bilong Bikpela, olsem na long olgeta miting bilong ol pasto bilong Asembli ov God long Ostrelia, tok bilong en i stap. Em i save raitim pas o toktok long ol olsem, "Bikpela em i skrapim bel bilong mi long yumi mas kirapim wok long Papua Niugini. I no longwe long yumi. Klostu tasol. Em ol wanbaundri bilong yumi tru ya, wansolwara yet ya. Kaman! Yumi go!" Na planti ol arapela ol i tok, "Yes, gutpela long yumi go, tasol wet pastaim. Yumi i nogat wokman na pasto inap yet. Bihain wok bilong yumi i kamap bikpela, orait em bai yumi i lukluk long Papua Niugini."

Ol i wok long toktok planti, tasol Davidson em i wok long toktok planti moa yet. Em i statim toktok taim woa wantaim Japan i laik stat na em i wok long

toktok inap long woa wantaim Japan i go pinis gen. Taim woa i pinis, em i lusim Daintri na em i go wok pasto long sampela hap. Tasol em i wok long toktok yet. Mekim mekim na long 1947 ol het pasto i salim em i kam long Pot Mosbi bilong askim nambawan gavman long em i ken orait long ol i kam wok long Papua Niugini o nogat. Ol i tokim em yet long kam na kisim tok orait long gavman na painimples bilong wok. Na ol i tingting long painim sampela yangpela man bilong kam bihain na kirapim dispela wok.

Taim em i kam askim nambawan gavman, em i tok orait long Asembli ov God i kam statim wok long Papua Niugini. Em i tok orait long ol long wok long Hailans o long Sepik Distrik. Tasol taim dispela nambawan gavman i lukim pinis pasin bilong Davidson, em i tokim em olsem, "Mi amamas long yu ken kirapim wok long Papua Niugini. Mi amamas, tasol mi gat wanpela tingting: Mi no laik bai ol yangpela tasol i kam wok. Sapos kain man olsem yu i stap wantaim ol, em bai i gutpela. Yu ken i stap olsem het bilong ol na ol i ken i kam wok wantaim yu."

Davidson i kisim dispela tok orait nau, na em i go lukluk pastaim long hap bilong Goroka. Taim em i raun long hap bilong Goroka, ol lain bilong Lutheran Misin ol i helpim em gut tru, na wanpela pasto bilong ol i bin raun wantaim em. Na tu, long Goroka em i bungim wanpela kiap husat i bin wok long hap bilong Maprik, en em i wok long stori moa yet long en long Maprik. Olsem na em i kam raun tasol long hap bilong Maprik na lukluk liklik. Lukluk pinis, orait em i go olsem long Lae na em i go bek long Ostrellya.

Taim em i go bek long Ostrellya, ol het pasto i harim pinis ripot bilong Davidson na ol i amamas. Na ol i wanbel tu long Davidson i kam bek gen long Papua Niugini na bosim dispela wok. Na ol i tok orait long em long raun long sampela haus lotu long Ostrellya bilong kirapim ol manmeri long helpim dispela wok, na bilong kirapim tingting bilong sampela long go wok wantaim em long Papua Niugini. Tupela yangpela man i harim toktok bilong en long dispela taim na


tupela i stat long redi long go long Baibel Skul
bilong redi long kam long Papua Niugini. Em Morris
Hovey na Cyril Westbrook.

KAM LONG PAPUA NIUGINI

Ol lain Ekseketiv i wok long skelim dispela ripot nau, na ol pilim olsem ol i mas statim wok long Papua Niugini nau. Tok i stap pinis nau, na Davidson em i wok long redi na ol Ekseketiv i wok long painim ol sampela man bilong wok wantaim em. Bilong poromanim em long statim wok, em i kisim wanpela narapela man nem bilong en, Don Westbrook. Em papa tru bilong Cyril Westbrook, nau em i stap wantaim yumi. Don Westbrook tu em i wanpela pasto long Ostrelya, na tu, em i wanpela kamda, olsem na em i rait man bilong poromanim Davidson long statim wok na kirapim haus slip samting.

Tupela wantaim i lusim famili bilong tupela long Ostrelya, na long Oktoba 22 1948, tupis stret i kalap long wanpela sip ol i kolim Malaita. Ol i kam i kam inap olsem tripela wik long rot, na tupela i kamap stret long Lae. Kamap pinis long Lae, na Davidson i go lukim ol kiap, long wanem, em i tingting long kisim balus na go lukim nambawan gavman long Mosbi bilong stretim gut tok wantaim em. Tasol kiap em i tokim em long nambawan gavman bilong Mosbi bai i kam long Lae na go long Madang gen. Olsem na em i tokim Davidson long wet long sip tasol. Em i tok "Sapos sip bilong yutupela i lusim Lae hariap, orait, yutupela i ken i go wantaim sip na wetim nambawan gavman long Madang gen. Em bai i kam yet."

OL PIKSA



Wokim kem long
Iligita

Ebrahim Kutitamba
wantaim meri
bilong en.

Pasto Davidson
wantaim tupela
bikman.





Davidson famili taim ol i stap yangpela tru.



Sande moning lotu long Iligita - 1954.



Haus bilong Mr na Mrs Easton long Yangoru.

Tupela i wet wantaim sip long Lae, mekim mekim nogat, orait, taim sip i go long Madang, tupela i go wantaim sip. Kamap long Madang pinis na i stap, na em nau, dispela nambawan gavman em i lusim Mosbi na Lae na em i kamap long Madang. Davidson em i go stori gut wantaim em, na nambawan gavman em i tok, "I orait, mi laikim bai yupela i mas statim wok long Sepik Distrik. Na tumoro mi bai mi go long Wewak na yu ken i go wantaim mi. Yumitupela i go kisim gut stori long kiap bilong Wewak pastaim." Orait, tulait moning, nambawan gavman wantaim Davidson i kalap long wanpela liklik balus, na Westbrook, tarangu, em wan i drai nating long Madang na i stap. Pastaim em i slip yet long sip, tasol sip i laik lus lain gen olsem na ol i rausim em na em i go slip long wanpela liklik kona long Madang, wetim Davidson i stap.

Tupela i kam stori long kiap long Wewak na kiap yet i kamapim tingting long ol i mas statim wok long hap bilong Maprik, long wanem, em i save olsem Maprik em i wanpela nupela hap.

Stretim tok pinis, orait tupela i kam bek bungim Westbrook long Madang nau, na Davidson wantaim Westbrook i kisim olgeta samting bilong tupela na kalap long wanpela liklik sip ol i kolim 'Motoko' na tupela i kam long Wewak. Ol i kamap stret long Wewak long namba 14 de bilong mun Novemba, 1948. Tupela i stap wanpela wik long Wewak bilong stretim tok wantaim kiap na redim samting bilong tupela. Wan wik i pinis na Davidson i kalap long balus na em i go pastaim long Maprik, na las tru, long namba 21 de bilong Novemba, 1948 Westbrook i kalap long balus na em i go pundaun long Maprik.

Tasol Maprik bilong bipo - mi no ken tok - em i raskal taun stret. I gat wanpela haus kapa tasol i stap, em haus bilong kiap. Em tu, ol i no wokim gut. Banis bilong en ol i wokim long pepa tasol. Arere long ples balus i gat sampela ol haus morota tasol i stap. Stua bilong Mr. Woods na wanpela haus kiap tu em i stap arere long ples balus.

Tupela i kam pundaun tasol long Maprik, na kiap yet,

nem bilong en Mr. Havilan, em i kam sekhanim tupela na em i sakim tupela long dispela haus kiap arere long ples balus. Em nau, tupela i slip i stap long dispela haus kiap arere long ples balus long Maprik.

Na olgeta de tupela i wok long raun nabaut long wan wan ples bilong painim hap graun bai ol i ken i stap long en. Tupela i wokabaut long lek tasol i go inap long Jikenambu, long hap bilong Hayfield bilong painim wanpela hap graun. Tasol tupela i no painim wanpela gutpela hap. Na beten bilong tupela i no pilai pilai. Long wanem, tupela i kam drai nating. I no olsem wanpela man i singaut na ol i kam. Ol i no save long wanpela man, na i nogat wanpela man i save long dispela wok ol i kam long en. Tupela i kam pinis na tupela tasol i stap.

Taim tupela i kam long Maprik, Wang bilong Timboli em i wok mankimasta long haus bilong kiap. Na em i lukluk i stap na tupela i kam pundaun long ples balus. Kiap i tokim Wang, "Tupela gutpela man ya. Tupela i bringim gutpela tok i kam." Wang i harim olsem na bihain em yet i stat long lotu wantaim tupela. Na wanpela apinun, kiap i kisim tupela i go kaikai long haus bilong en na Wang i kukim kaikai bilong tupela.

Ol Katolik i kam i stap long Maprik tripela mun pinis, na bihain tupela i kam kamap. Man ya, Mr. Woods i bin harim liklik tok taim Davidson i kam lukluk long Maprik, na em i salim tok long ol Katolik long kam hariap. Nau long dispela taim, yumi i save sindaun gut wantaim ol Katolik. Tasol bipo, i nogat tru. Pasin bilong birua na resis em i stap bikpela tru insait long tingting bilong tupela sios wantaim. Olsem na taim Davidson tupela Westbrook i go pinis long lukim sampela ples bilong traim painim hap ples bilong sindaun, Pater i save bihainim tupela gen, na krosim ol pipel nogut nogut tru na tambuim ol long larim dispela tupela man i kam insait long ples bilong ol gen. Na em i wok long tok pretim ol lain bilong dispela ol ples long bikpela trabel bai i kamap long ol sapos ol i larim tupela i kam bek gen. Planti ol ples ol i harim dispela tok,

na ol i no larim tupela i kam bek long ples bilong ol. Mekim mekim na tupela i painim taim stret.

Tasol bihain liklik, Sirinjui, nambawan luluai bilong Maprik em i kam lukim kiap. Em i makim sampela ol luluai tultul bilong sampela ples klostu long Maprik, na em i tok, "Ol lain bilong Nerikam, Kominibus na Sherikam i harim olsem i gat sampela man i stap ol i painim graun bilong ol i ken sindaun long en. Ol i laik kisim ol na bai ol i stap long graun bilong ol." Orait, kiap i harim dispela nau na em i go kisim Davidson wantaim Westbrook, na ol i go wantaim bilong lukim dispela graun. Ol lain bilong ples ol i soim ol wanpela liklik maunten, klostu liklik long Amagu. Nem bilong dispela maunten em Iligita.

KAM LONG ILLIGITA

Taim ol i go lukim Iligita, ol i lukim tupela hap semen i stap. Wampela em i bikpela hap semen we wampela man, Mr. Muli i bin sanapim haus sel bilong en antap long en taim em i wok long painim gol long wara Amagu long guttaim yet. Na ol lain bilong ples i tok long givim dispela graun bilong Mr. Muli long Davidson. Ol i wokabaut wantaim bilong lukim mak bilong dispela hap graun, na ol i painim wampela narapela hap semen i stap. Dispela semen em i wampela semen bilong masta mak nau ya. Bipo wampela masta mak i bin pulim sen long dispela hap graun taim ol i laik givim long Mr. Muli na em i bin planim dispela semen. Taim ol i lukim dispela graun pinis, ol i go bek long opis bilong kiap bilong lukim ol mep. Long daunbilo bilong dispela mep ol i lukim stret nem bilong masta mak i bin pulim sen long dispela graun. Em Mr. Sheldon, dispela man pastaim em i bin pes drai nogut long Davidson, na bihain em i tokim em long bihainim lek bilong em yet. Nem bilong em yet stret i stap long dispela mep. Olsem, na tok bilong en em i karim kaikai tru. Em i tok, "Yu mas bihainim lek bilong mi." Abrus! Davidson em i bihainim stret lek bilong en i kam i kam, na kamap pinis long Iligita.

Ol i lukim Iligita pinis, na bihain^e kiap em i askim ol pipel long ol i wanbel long givim dispela graun long tupela o nogat. Ol i wanbel olsem na kiap em i givim sampela ol presen long ol, olsem sampela akis,

na busnaip na tin mit, ol samting olsem, bilong stretim pe bilong dispela graun.

Tasol long tumora, Davidson wantaim Westbrook i go bek long opis bilong kiap, na tupela i lukim dispela olgeta samting em i slip stret long opis bilong kiap i stap. Tupela i askim kiap, tasol nambawan kiap em i go pinis long patrol, na namba tu em i tok, "Nogat. Dispela ol lain ol i bekim bek ol dispela samting. Ol i no laik bai yupela i kisim dispela graun nau." Tupela i lusim kiap na go bek long haus, na tupela i hatim wailes bilong tupela i stap. Em mi tok long beten nau ya. Bihain kiap yet i painimaut olsem, Pater em i go bihain long en, na em i sutim bel bilong ol pipel na tambuim ol long larim dispela tupela man i kisim dispela graun. Nambawan kiap em i kam harim olsem long apinun, na em i singautim dispela ol luluai na tultul. Ol i kamap pinis, na sori tru, em i no pilai long ol. Hatim ol nogut nogut tru. Em i tok, "Yupela mekim wanem? Yupela laik giaminim mipela a? Asde tasol yupela wanbel tru na nau olsem wanem? Goan, kisim dispela ol samting! Karim!" Olaman, em i hatim ol tru. Yu save, kiap bilong bipo. Tasol tenkyu tru long Bikpela long kiap em i wanbel liklik wantaim Davidson na Westbrook, long wanem, sapos nogat em bai tupela i painim hat tru long kisim ples bilong sindaun.

Tasol kiap em i hatim dispela ol luluai tultul na ol i kisim dispela ol samting i go bek. Em nau, na tupela i go sindaun long Iligita. Na tupela i lukim dispela hap semen bilong Mr. Muli i stap na tupela yet i bin taitim haus sel bilong tupela antap long dispela hap semen. Nau bikpela haus lotu long Iligita i sanap long ples we dispela semen i bin i stap.

STATIM WOK

Tupela i kisimples pinis long Iligita na tupela i stap nau. Na Westbrook i stap wantaim Davidson inap long 6-pela mun samting bilong statim olgeta wok. Pastaim tru, tupela i bin kirapim tupela kain wok. Wok bilong lotu na wok bilong redimples. Maski ol i no save long tok pisin, ol i traim wokim lotu wantaim sampela wan wan man i save kam sindaun wantaim ol.

Long sait bilong wokim haus, tupela i wokim bus kem pastaim na bihain tupela i wokim wanpela gutpela haus liklik long Iligita, redi long famili bilong Davidson i kam. Long dispela taim yet tupela i stat long mekim sampela wok long autim tok bilong God na kirapim lotu. Long mun Mas 1949, meri na pikinini bilong Davidson ol i lusim Ostrelya long sip na ol i kam kamap long Madang. Ol i kamap nau, na Davidson i lusim Westbrook na em i go kisim ol. Na bihain long mun Epril, Westbrook i lusim Davidson na em i go bek long Ostrelya. Long 1949, Davidson wantaim lain bilong en, em ol tasol i stap, na ol i wok long kirapim dispela wok i stap.

NUPELA MISINERI I KAM

Tasol long 1948 yet i gat tupela man we God i bin skrapim bel bilong tupela long kam long Papua Niugini. Yumi lukim pinis nem bilong dispela tupela man, em Morris Hovey wantaim Cyril Westbrook. Taim Pasto Davidson i no kam yet long Papua Niugini, em i

bin raun long sampela ol haus lotu long Ostrellya, na Morris Hovey i harim em i autim tok bilong God na stori long wok ol i laik mekim insait long Papua Niugini. Long dispela nait yet, God i skrapim tingting bilong Morris Hovey, na em i tokim God olsem, "Mi bai mi wok bisnis na mi givim sampela win mani bilong dispela bisnis long helpim dispela wok long Papua Niugini." Tasol God i bekim tok bilong en olsem, "Mi no wari long mani bilong yu. Mi laikim yu yet bai yu go long Papua Niugini." Morris Hovey em i harim dispela tok bilong God na long 1949, dispela tupela yangpela singel man i bin i go long Baibel Skul long Ostrellya.

Orait long mun Februeri, 1950, Morris Hovey em i lusim Ostrellya, na long mun Mas em i kam kamap. Long dispela taim, ol lain bilong Wora, long hap bilong Hefil, ol i putim ripot long dispela wok i mas kirap long hap bilong ol. Davidson wantaim Morris Hovey i bihainim dispela singaut bilong ol na tupela i wokabaut i kam daun. Tupela i stretim tok pinis, na bihain Morris Hovey em i kam kirapim kem long Namba Sikis, long hap bilong Tamaui, na em i statim wok long dispela hap.

Long mun Ogas long 1950 Cyril Westbrook em i lusim Ostrellya, na em i kam kamap long Papua Niugini long mun Septemba. Em Pasto Westbrook nau em i stap wantaim yumi. Cyril Westbrook em i pikinini tru bilong dispela poroman bilong Davidson, Don Westbrook. Taim Cyril Westbrook em i kamap, Davidson i salim em i kam i stap wantaim Morris Hovey long Namba Sikis. Tupela singel man i wok poroman na i stap.

Bihain, long pinis bilong mun Septemba long 1950, tupela marit gen i kam. Em Pasto na Mrs. Easton. Ol lain bilong Kalabu i singaut pinis long dispela wok i mas kirap long hap bilong ol, na Davidson na Hovey i statim lotu wantaim ol pinis. Olsem na taim Pasto na Mrs. Easton i kamap, ol i salim tupela i go stret long Kalabu.

WOKABAUT LONG KA

Long 1948, taim Davidson i kam i stap, Maprik em i gat wanpela kat tasol i stap. Em wanpela lapun jip bilong kiap yet. I no gat wanpela arapela kat i stap. Long 1948 na 1949 na 1950 ol misineri bilong yumi i nogat wanpela kat. Taim ol statim wok long Tamaui na Kalabu, em ol i wokabaut long lek tasol. Ol i save baim ol man bilong ples bilong helpim ol long karim samting bilong ol.

Long 1951 ol i baim wanpela ros jip. Long taim bilong pait wantaim Japan, ol i bin yusim dispela jip long hap bilong Wewak. Taim pait i pinis, ol i tromwe dispela jip long tais i stap. Orait, wanpela masta long Wewak em i kamautim dispela jip na stretim gut na em i yusim i stap. Orait, lain bilong yumi i baim dispela jip long en long 150 paun mani. Baim pinis, na ol i pulimapim long wanpela bikpela balus, na balus i karim dispela jip i kam long Hefil. Kisim long Hefil, em nau, lain bilong yumi i gat kat nau. Na dispela em i helpim ol tru long karim tok bilong God raun long ol nupela ples.

WOK I KAMAP BIKPELA

Winias, wanpela man bilong Wingei em i wok long hausik long Maprik, na em i save long Pasto Davidson. Em i go long ples, na em i stori long ol long dispela nupela misin i kamap pinis. Ol sampela lain bilong Wingei 1 na Wingei 2 i harim tok bilong en, na ol i wokabaut i kam long Maprik bilong bringim ripot bilong ol. Ol i laik bai dispela wok i mas kirap long hap bilong ol. Orait, Pasto Davidson i harim ripot bilong ol Wingei, na em i kisim Pasto Easton na Hovey na Westbrook, na ol i go long lukim kiap long Yangoru. Ol i kisim jip bilong ol na ol i go. Tasol ol i no gat rot bilong go long Wingei. Ol i bihainim rot antap long sait bilong Yamil, bihainim kil bilong maunten tasol, kamap long Kaboibas na kapsait i go daun long Yangoru.

Ol i go lukim kiap long Yangoru, na Westbrook wantaim Kiap na sampela ol Wingei ol i wokabaut long bus rot na kam bek long Wingei. Na Davidson na ol arapela ol i kam lusim ka long hap bilong Malembeim na ol i bailim rot i kam daun long Wingei gen. Ol i stap wantaim ol Wingei na stretim toktok wantaim ol. Bihain ol i wokabaut long rot gen inap long Malembeim na ol i go bek long Maprik. Em long dispela taim nau, tok i pas na Westbrook em i go i stap long Wingei. Em long Epril 21, 1951.

I stap i go, na long 1953 ol Yangoru i bin singaut nau. Ol i laikim bai dispela wok i mas kamap long ol tu. Olsem na Pasto Davidson na pikinini bilong en,

Alan na Jon, wantaim brata bilong Pasto Hugh Davidson, em Alista Davidson, ol i go kirapim wok long Yangoru. Ol i statim pinis, na ol i larim Alista i bosim i stap. Long dispela taim, Pasto na Mrs. Easton i bin i stap long liv. Liv pinis na kam bek, orait, tupela i go long Yangoru na mekim tru wok. Mrs. Easton i statim wanpela skul bilong lainim ol manmeri long rit. Na wok bilong lotu em i gohet tu.

Long 1953, ol sampela lain bilong wara Sepik ol i kam lukim Davidson long Maprik. Olsem na long 1954, Pasto Davidson i stat long putim ai nau long bikwara bilong yumi, wara Sepik. Long dispela taim, i nogat rot ka i go kamap long Wewak olsem na olgeta bensin bilong ka, na olgeta arapela bikpela samting bilong misin na gavman i save kam long sip inap long Pagwi. Olsem na ka bilong yumi i save go long Pagwi wan wan taim bilong kisim ol dispela samting bilong misin. Taim Davidson em i go daun long Pagwi, em i save wokim lotu o RI long dispela gavman skul long Pagwi. Na long dispela rot em i wok long painim sampela we bilong wok bilong Asembli ov God i ken kamap stret long bikwara bilong yumi, wara Sepik.

MAF i statim wok bilong ol long Wewak long 1951. Dispela ol kristen kepten bilong balus i lukim Wewak i stap nating, nogat wanpela talatala lotu i stap. Olsem na long 1953, ol i stat long putim lotu long Wewak long olgeta Sande. Ol i wokim dispela i go inap long 1956, tasol ol i wari, long wanem, ol yet ol i sipim het long ranim ol balus, na ol i no gat taim long sipim het long autim tok bilong God tu wantaim. Olsem na long 1955 ol i putim ripot long ol lain bilong yumi long salim misineri i kam i stap long Wewak bilong mekim tru dispela wok. Olsem na wok bilong yumi i stat long Wewak long 1956. Davidson em bin yusim ensin bilong jip, na wokim wanpela liklik somil, na em i bin yusim long brukim sampela plang long Yangoru bilong wokim haus kapa bilong misineri. Orait, em i kisim dispela somil i go daun long Wewak, na wanpela nupela misineri, Jim Conley em i kam wok wantaim em. Wok wantaim nau, na ol i sanapim wanpela haus misineri long Wewak. Pinis

nau, na Jim Conley wantaim famili i kirapim tru wok long Wewak inap long taim Jim Conley i kisim bikpela sik long 1964 na em i dai.

Long 1955 na 1956, tok i pas wantaim wanpela ples long hap bilong wara Sepik nau. Dispela ples ol i kolim Yamanambu. Ol i tok orait long sakim wanpela hap graun bai misin i ken sindaun long en. Tok i pas pinis na Davidson yet em i kam daun long Yamanambu wantaim tupela pikinini bilong en, na ol i kirapim wanpela haus long Yamanambu. Haus i pinis, orait, Ron Westbrook, wanpela famili brata bilong Cyril Westbrook, em i kam kirapim wok long Yamanambu.

Ating pasin bilong Davidson em i lainim yumi long sampela gutpela tingting tu. Pasto Davidson, em i wanpela strongpela tingting man stret - man bilong brukim bus tru. Planti ol dispela misineri i kam bihain, ol i no sindaun long wanem haus. Ol i sindaun long haus we Davidson wantaim pikinini bilong en ol i wokim. Em i Fil Lida na em yet em i misineri na em yet em i man bilong autim tok bilong God. Tasol em i wari long tok i mas kisim olgeta kona, olsem na taim em i harim tok long nupela lain bai i kam, em i save sipim het bilong redim ples bilong ol bai ol i kam na mekim wok. Ating i gutpela sapos yumi i kisim pasin bilong em tu.

Long 1959 wok i kirap long Jambi. Sampela ol man bilong hap bilong Wosera ol i bin stap long haus kalabus long Maprik, na taim Pasto Davidson i go daun wokim lotu long haus kalabus, ol lain bilong Jambitanget i bin harim tok bilong God. Taim ol i pinis kalabus, ol i singautim lain bilong yumi long i go i stap long hap bilong ol. Pasto Jacob Ganba wantaim Serebu bilong Kalabu, tupela i bihainim singaut bilong ol na kirapim wok long Wosera. Bihain, Serebu i kisim sik na dai, na Kerain bilong Serendu i senisim em bilong wok wantaim Ganba. Ol misineri bilong arapela kantri ol i go bihain tasol long 1962.

Long 1959, wok i stat long Kusambuk tu. Ol lain bilong Yangoru i save go na autim tok long ol ples,

na planti manmeri tru i bin kamap kristen. Pasto Spence i bin go i kam long Yangoru bilong kirapim wok long Kusambuk long dispela taim. Long 1960 em i kam sindaun long Kusambuk na kirapim dispela wok.

Long 1959, wanpela arapela samting i bin kamap na dispela em i senisim tru ol wok bilong yumi. Holi Spirit i bin pulimapim planti manmeri long hap bilong Is Sepik Provins. Pastaim long dispela, planti manmeri i kamap kristen pinis, na sampela wan wan i kisim baptais long Holi Spirit. Tasol long 1959, lapun Pasto Evans em i kam na beten long planti ol kristen na ol i kisim baptais long Holi Spirit. Long dispela taim, wok bilong God long hap bilong yumi i kamap bikpela tru. Taim dispela rivaival i stat long Epril 1959, yumi i gat 18 sios i stap pinis. Long pinis bilong 1959, yumi i gat 40 sios i stap. Long pinis bilong 1961 yumi i gat 70 sios i stap, na long pinis bilong 1963 yumi i gat 120 sios.

Na long 1962, wok i bin stat long hap bilong Murik. Pasto Peter Fairbanks i statim dispela wok.

WOK BILONG OL

O WOK BILONG YUMI?

Stori bilong yumi em i go moa yet, na nau sios bilong yumi em i stap pinis insait long 12-pela Provins. Tasol bai mi larim olsem, long wanem, mi laik stori tasol long stat bilong wok i kirap. Na long ol stori bilong stat bilong wok, yumi skrapim antap tasol bilong ol stori. Sapos yumi go insait long dispela olgeta stori wan wan, em bai pepa i pinis nating.

Tasol mi save tingting long dispela stori bilong Pasto Davidson, long wanem, God i yusim em yet long statim Asembli ov God Sios long Papua Niugini. God i sutim bel bilong en, na em i kam, na em i no pilai pilai long wok. Em i mekim tru. Bihain, em i wok wantaim yumi inap long 1960, na em i lusim yumi na kirapim wanpela narapela misin, ol i kolim New Guinea Gospel Mission, long sait bilong Timboli na Bai na ol dispela hap insait long Is Sepik Provins. Kirapim pinis, na em i wok i stap inap long 14 yia gen.

Bihain, em i winim taim gut tru, em i painim sik. Taim em i slip i stap long Boram hausik, Pasto Jacob Ganba em i go lukim em na Davidson i tokim em, "Jacob, yu no ken tingting planti long mi. Mi wok pinis na nau yupela ol pikinini bilong mi i stap nau. Mi dai pinis, orait yupela i mas planim mi

tasol long Wewak. Papua Niugini em i ples bilong mi." Orait, long 21 de bilong mun Ogas, 1974 em i dai long Boram haus sik na ol i planim em long Wewak. Nau semen bilong makim matmat bilong en em i stap long ples matmat long Wewak poin. Taim em i dai pinis, tarangu, meri bilong en em i lusim Papua Niugini na nau em i stap long Ostrelia na nau long 1986 em i stap yet.

Tasol mi wok long tingting long hat wok bilong Davidson na Don Westbrook, na Morris Hovey, na Pasto Easton na Cyril Westbrook nau i stap, na ol dispela lain. Lain bilong brukim bun tru long bipo. Na dispela hatwok bilong ol long bipo, em i helpim yumi gut tru.

Tasol dispela stori bilong wok bilong ol i save kotim mi gen. Mi save pilim na mi wok long tingting olsem, "Olaman, ol man i go pastaim ol i wok hat tru olsem, na mi manki i kam bihain, bai mi mekim wanem? Mi ken larim mak bilong ol i stap na mi wok isi isi tasol, o mi ken surikim mak bilong ol na gohet moa yet". Tasol laik bilong mi em long surikim mak i gohet moa yet.

Mi no pilim olsem yumi i gat dinau long dispela ol man na mi mekim dispela tok. Nogat. Long wanem ol yet i gat dinau long God na long ol man i no save long tok bilong God na ol i wok. Tasol i luk olsem, dispela wankain dinau em i stap long yumi tude. Olsem na dispela kain stori em i ken sutim tru bel bilong yumi, na yumi i ken tingting na tok, "Kain olsem, mi tu mi no ken pilai pilai. Mi mas kisim wankain skel olsem dispela ol man bilong bipo. Mi mas sipim het na gohet moa yet." Na sapos yumi i mekim olsem, bai dispela blesing bilong God nau i stap wantaim mipela, bai i no inap pinis long yumi tasol. Nogat! Em bai i ken bruk na kamap bikipela moa, na karamapim planti arapela man na meri nau i stap, na planti lain pikinini na tumbuna na pupu i kam bihain bihain tu wantaim.

BIHAINIM LEK BILONG MI

STORI BILONG ASEMBLI OF GOD LONG PAPUA NIUGINI

Kevin Hovey i raitim.

Asembli ov God em i wanpela Pentekostal Sios i bin statim wok insait long Papua Niugini long 1948. Wok bilong ol i bin stat long Is Sepik Provins, na nau em i stap pinis long planti provins bilong yumi. Nau ol i gat 300 kongrigesen pinis insait long Papua Niugini.

Dispela buk em i stori long stat bilong dispela Sios insait long Papua Niugini. Planti memba bilong Asembli ov God Sios i save amamas long harim stori long wanem rot dispela sios i stat. Dispela buk bai i helpim ol wantaim planti ol arapela manmeri tu long save gut long dispela stori.

Dispela buk i no mining long litimapim nem bilong dispela sios, o sampela pasto o misineri bilong ol. Dispela buk em i bilong litimapim nem bilong God long bikpela wok em yet i mekim kamap insait long Asembli ov God Sios long Papua Niugini.

ISBN 9980-85-704-8